

## 1 Tésáróníka

Ísu wíyómpa'a iyówana Póro moórá-waai-aataiya'iyo miyáumai-aatai maisuwéna maanááímá agaimái Tésáróníkaa-naoraa-waasifa'a agaimái mátímakaiye. Póro ásé-ai kosimátimuwasa isésa érai'e sésa Ísumpa'a timankúnkúmba uráawe. Mináái Aantá-waasi-taai-aufaifimba 17:1-9-fimba wéraiye.

Ísun-ai Póro fi'o-fi'on-daopa'a kosimátimena Kórinti-naopa'a koméronka'a Tímóti Tésáróníkaa-naopaken-kwaasi-taai kosimátimena wéaisai-un-aaima kosimámuwana anondáá-ai agaimái timúwasa mátímakaawe.

<sup>1</sup> Kemá Póro maanáái maanáúfáífímbá agai-timúmpo isáaro. Moóráwígon-awi'a Sáírasiye moóráwígon-awi'a Tímótiye kesé'o méraayanka'a moórá-ai sénaumpo isáaro. Tésáróníkaa-naopakewi Maníkóní waási isáaro. Maníkó kentáásifowae'o kááísamaimo mé'o Fasi'aénkó Ísu Káráísitiye'o kááísamaimo méraawi isáaro. Maníkó úwoi wétuwa'nai-ena faru wéuwatinkaintafe'a inái sune.

*Tésáróníkaafaken-kwaasi Maníkómpá'á timankúnkúmba uráan-ai.*

<sup>2</sup> Inaimó súndarataamo únda kembiwísáféta imáyáama éta Maníkómpá'á aasiyaasí súwiyosa wésune. <sup>3</sup> Ísun-aaisafe'a timankúnkúmba é'a pó'a wení kisauma kawé'-úmai wémaewe. Maníkómbá tirumbó wéametafe'a pó'a kawé-kísáúmá fasi'ámai wémaewe. Kentáásí Fasi'aénkó Ísu Káráísiti érai'a kumíniye sentáfé'a pó'a fasi'ámai mé'a wéamu'maraawe. Miyaráán-úmai méraantafeta imáyáama éta Maníkó kentáásifowampa'a súwiyosa sune. <sup>4</sup> Maníkó arumbá tiména wení waási-i'o uwátínkaraimba éta tuwánaraumne. <sup>5</sup> Ímba kentáásí imáyáfinkemba

## 1 Tésáróníka 1:6 2 1 Tésáróníka 1:10

úwoi-aaisa kosimátimewandanifo Maníkóní Ufaen-ámútánkó keséta mérowata Maníkóní fasi'aénkwará'á ásé-aii kosimátimeta ásé-aaisafeta simankúnkúmba fasi'ámai uráundasa minásé-áái kosimátimewanata ísaraawe. Ísowata séta Maníkóní waásin-owesa siyáumne. Kesétaamo maéwáandarata wétuwa'nai-eta méraawana'a suwánaraawe. <sup>6</sup> Fasi'aénkómó úntenkware kesáámó ówándantenkware'a miyá uráawe. Miyámó umbá umbái tiyómbanifo ímba ifátuwanae sumbá simátímakon-aaima méta'otokaawe. Maníkóní Ufaen-ámútánkó imáyáama timúwa'a tirumbá kawe'-úmai mé'a ásé-aii méta'otokaawe. <sup>7</sup> Miyáumai mérowasa pósa Maníkón-aaisafesamo timankúnkúmba on-kwáásímá Máséndóniyaafakene Ákáyaaafakene miyáumai-naoken-kwaasi kembá tuwánésa kemó untembá miwí uráawe. <sup>8</sup> Fasi'aénkón-aii kentópakemba simátíma'maesa kuráawe. Ímba Máséndóniyaa-waasiwara Ákáyaa-waasiwara aantembanifo seyaafá'-áémpákén-kwáásíwará'á ísaraawe. Maníkón-aaisafe'o timankúnkúmba on-áái seyaafá'-áémpákén-kwáásí ísaraawe. Maníkómpá'ó kááísamai méraan-aii é'a ísáámba póta ímba anekata simátimenaumne. <sup>9</sup> Kempátáámó komaéwáandara'a kawetáámó uwásínkarontafesawe sésa kawe'-áái wésewe. Waántá-waasiti aambá tuwésa Maníkómpá'á tiyóntafesawe sésa kawe'-áái wésewe. Maníko fasi'aénkwaráwí érai-Fasi'aenko wení kísau wémaentafesawe sésa kawe'-áái wésewe. <sup>10</sup> Aneka'á wíyómpakemba Maníkón-ááninko Ísu kumíníye sé'a wéamu'maraantafesawe sésa kawe'-áái wésewe. Maníko Ísumba pukómpinkemba iyáfasinankowana sáwí-imayaagomo ta'ótokaimpinkemba faúsinkenasa kawepátá mósinkena séna Maníko aafimbó maitinkáíndara'a faútinkaundawí ímba maitinkáíníyemo siyáiwaimba amu'maráantafesawe sésa kawe'-áái

wésewe.

## 2

### *Tésáróníkaafa'a Póro kísaumo maiyáin-aai.*

<sup>1</sup> Kentáásí waásisono. Kesé'o komaéwándarata áúwara-kisaumo maéwándasa éta suwánaraawe. <sup>2</sup> Ímbo kentópa'o kówánda-kanaafinta Fírípái-naopa'a komaéwánasasa suwánésa sínkamesasa sáwítaamo uwásínkón-aai é'a ísaraawe. Maníkó wení fasi'aémbá símakowanasa póna ímba sáá'a úwata ímba tiyawembá ówándasa Tésáróníkaafata kentáá Maníkóní ásé-aaisa kosimátímakaumne. Sáwí'o uwásínkówisa umbaisá siyómbanifo ímba tuwááwándasa <sup>3</sup> ímba karo'-ímáyááfínkémbá simátimeta ímba aare-úmén-ímáyááfínkémbá simátimeta ímba waé'wáé-ááífínkémbá simátimewandasaanifo <sup>4</sup> Maníkó kentáásáféna séna kesí waási ontáfé'a ásé-aai kosimátíma'mae'a koró súwata simásímakain-aai kosimátíma'maeta kuráumne. Maníkó wen-ísarena kesiruntá tuwináínda póta kísau wémaeta séta waásimo suwánésasaamo ésa tuwímbai aamoí íyasa tuwímbai ímba aamoí íyamba póna Maníkó suwánénasa aamoí íníye-imayaa éta kísau wémaeta <sup>5</sup> kentópa'a ásé-aai kosimátimeta ímba tirunkáámbá kofaiyá'mai-aai fínkemba kosimátimewandasa ísaraawe. Ímba símai fí'owani moparáwíntáféta súraniyamba wéeta kosimátimewandasa Maníkó suwánaraiye. <sup>6</sup> Ímba símaimo kembiwíwára fí'on-kwaasiwara'a kesúwíta óraa'a ónae-imayaan-oyo séta kosimátímakaumne. Kesé'o maéwándarata Ísu Káráisiti si'marón-kwaasisa ówándanifo ímba óraa'-waasi-ita úmai méta <sup>7</sup> wempatá úmai méta aaregómó wení iyámpóimo káráwiyíntenta uráumne. <sup>8</sup> Kembiwí kesiruntá tímaketa Maníkóní ásé-aai kosimátimeta sínkamiyata puwúnafo-imayaa ínta ówándasa Maníkóní ásé-aaisa kosimátímakaumne.

<sup>9</sup> Kentáásí waásisono. Kesé'lo maéwáandarataamo fasi'aén-kísáúmó maéwánda tááka'a makáawe. Maníkóní ásé-aaimo simátimewandasa aafáyáara'e fenómpinka'e nó'waane kísausa maiyáumne. Tómbá ímba úwoi simíwae séwáandasa tómbá méyánúmai wéneta maiyáumne. <sup>10</sup> Kembiwí Maníkómpá'á timankúnkúmba uráawise'a maéwáandarata kawé'-úmai arupíse úmai méta ímba sáwí'a ówáandasa maéwána'a suwánontemba Maníkówárátá suwánaraiye. <sup>11-12</sup> Tifoísáimo kentí iyámpóimo káráwiyonten-úmai moórá-mora kesáámá káráwiyeta méta faru uwátinketa Maníkón-aai kawé'-ááimá wésimatimeta séta miyaráámbá íyantafe'a Maníkómbá aráái wáiyana Maníkó aamoí íníyesa siyáumne. Maníkó wésimba pó'a wemó kawáánipa'o wení sámó kaipa'á táméranaawe. Miyámó íyantafe'a Maníkómbá

aráái wáiyana wemá aamoí íníye.

<sup>13</sup> Maarán-ááiwárátá Maníkómpá'á aasiyaasí súwisa súné. Maníkón-aai simátimewandarata kembiwí sé'a waási-taain-iyé ímba sumbá Maníkón-aain-iyé sé'a tirumpimbá fasi'ámai méta'otokaawe. Simátímakaunda-aai érai'a Maníkón-aain-iyé. Simátímakaunda-aaisafeta timankúnkúmba ombá póna minááígó wétuwa'nai-iyé. Mindásafeta iséta Maníkómpá'á aasiyaasí súwiyosa súné.

<sup>14</sup> Kentáásí waásisono. Yúndaa-aempaken-kwaasi Fasi'aénkóní waási Ísu Káráisitiye'lo kááísamaimo méraan-kwaasifa'lo paápé uráintemba kembiwíwará'á miyá uráiyé. Yúndaa-aempaken-kwaasimo miwífínkémbá Ísu Káráisitin-aaisafesa timankúnkúmba wéompinkemba sáwí'lo uwátínkaraantemba kentí waási kembá sáwí'a uwátínkaraawe. <sup>15</sup> MínYúndáá-wáásí tíwá'náma naaófá'á Maníkón-aai simátímakowi

tínkanto'naamai úmae wéiyuwasa putásowasa maimaé wéiyesa matínkámae íyówasa miwí tísaafitantamba ésa káfé'o méraawi Fasi'aénkómbá Ísumba tufúwana puwúwasa kentáámá sáwí'a uwásinkesa arááiwakaawe. Miyámó untáféna Maníkó ímba aamoí uwátínkaraiye. Miwí seyaafá'-wáásítí namuro-wáásíyáámbán-owe. <sup>16</sup> Maníkó sáwí-ampakemba kawé'-ámpá'ó métinkaindasafeta fí'onkaa-waasisafeta Maníkón-ai simátíma'maeta wégundasa Yúndaa-waasi aambá fáisinkesasa seyaafá'-wáásítí namuro-wáásíyáámbá wéowe. Tíwá'náti sáwí-kisauwara'a káfé'o méraan-kwaasi maimaé wéiyowana káfé'a Maníkó aaisambá wétiyiye.

*Póro aneká'á kotuwánánaemo siyáin-ai.*

<sup>17</sup> Kentáásí waásisono. Kembá tiyuwéta maanká'á ampáánká'á taméta kembiwísáféta imáyáa áfááraumai wéeta kembó kotuwánaanda-antafeta wésaafa-eta <sup>18</sup> aneká'á kotuwánánae séta kemá Póro sé'a aneká'á kotuwánánae símasíma'a wéunana waántáwanko aambá fáisinkaraiye. <sup>19</sup> Ánaaemba Fasi'aénkó Ísumo kumínda aúranka'a kométa nóintafetaawa amu'maránaum nóintafetaawa aamoisá ónaumno. Kembiwísáféta imáyáa éta aamoisá ona'á <sup>20</sup> kentáá súwí'a mósá maráiyana sirunkósá aamoí íníye.

### 3

<sup>1</sup> Kentáfékai óraa'-imayaa wéekainifo maankákái maékai kembiwí fí'opa'o méraantafekai Áténisi-naopa'a kerái maékai <sup>2</sup> Tímótimba ai'marááwáyana kentópa'a kuráiyé. Tímóti kentáásí kawé'-wáásí póna wesé keséta Maníkóní kísausa wémaunanasa póna Ísu Káráísitini ásé-ai simátíma'maena wéwiye. Koáfomba faiyáína'a Maníkómpá'á timankúnkúmba fasi'ámai íwae sé'a Tímótimba ai'marááwánana kuráiyé. <sup>3</sup> Maníkón-ai

ímbo ísááwi sáwí'a uwátinkaiya'a Maníkómbá áúwáafo sé'a Tímótimba ai'marááwánana kuráiyé. Maníkó séna kesááimo ímbo ísááwi sáwí'a uwátinkanaawe siyáimba pósa kentáá sáwí'o wéuwasinkaamba é'a ísaraawe. <sup>4</sup> Kesé'o maéwándarata séta sáwí'a uwásinkanaawemo siyáundasa káfé'a mápaape-isa'a wéawanaawe. <sup>5</sup> Kemá imáyáa é'a waántáwanko séna Maníkómbá auwésa kesáái isáíwae sintáfé'a miyá uráawe. Maníkómpá'á timankúnkúmba wéoo sé'a kentáái isánae sé'a Tímótimba ai'marááwánana kentópa'a kuráiyé. Kentópa'a kisaumo komaéwánda áúwara-kisauma maiyáunda káfé'a minkísáúgón-áúma áwiyo'wifo sé'a Tímótimba ai'marááwánana kuráiyé.

<sup>6</sup> Tímóti kentópa'a koména kouweréna kesópata téna kembiwísáféna séna Maníkómpá'á tirumbá timésa wenká'á timankúnkúmba fasi'ámai owé séna ásé-aaisa tasimásímakaiye. Kembiwí kentáfé'o sé'o kawé'-áái siyémo senkwárá'á tasimásímakaiye. Kesáámó sétaamo kembiwí kotuwánánaemo súna'o kentáásáfé'o tatuwánanaemo senkwárátá tasimásímakaiye. <sup>7</sup> Maníkón-aai simátimundarakemba tuwímbai sáwíta uwásínkáánka'a Maníkón-aaisafesa timankúnkúmba fasi'ámai on-áái tasimásímakaimba póna áfombo faiyáín-aai tasimásímakaiye. <sup>8</sup> Fasi'aénkómpá'ó kááisamaimo fasi'ámaimo méraan-aai iséta póta kawetá úmai méraumne. <sup>9</sup> Maníkómpá'á fasi'ámai méraawata póta Maníkónópata kentáásirunko kawé'á wéisata Maníkómpátá súwi sune. <sup>10</sup> Kentópataamo konda-ámbá Maníkó wi'maráíndasafeta fénáímpinka'e aafáyáara'e Maníkómpátá fasi'ámai áísai úmae wéiyune. Maníkón-aaisafe'a timankúnkúmba ombánifo moóráfa'a wétuwaantafeta kotúwa'nai ónae séta Maníkómpá'á fasi'ámaisá sune.

<sup>11</sup> Inaí súndasa pósarai Maníkó kentáásifowae Ísu kentáásí Fasi'aénkóe úmai kentópataamo konda-ámhá wisinkáyááye. <sup>12</sup> Inaí súndasa póna kesiruntá áfááraumai tímakaundanten-úmai Fasi'aénkómá imáyáa timína'a moórá-mora kentirumbá timé'a seyaafá'-wáásí kentirumbá timé'a ménaawe. <sup>13</sup> Miyá íyana Maníkó kentirunkómbá fasi'átinkaina'a Ísu kentáásí Fasi'aénkómó wení waásise'o kumíndara'a Maníkó kentáásifowan-aúranka'a kawé'-úmai méraiýana sáwí-aii kempímbá ímba wéraindasafeta inaí súné.

## 4

*Miyásáámó wéunanasaamo Maníkómó aamoisáámó wéuwasinkain-aii.*

<sup>1</sup> Kentáásí waásisono. Moórá-aiiwara'a ísáaro. Fasi'aénkó Ísuwe'o kááísamaimo méraundasafeta wa'wiséta óraaka'a simátimeta séta Maníkómbó arááiimo taiwáíní áwáumo aráátimundasa arááiwa'mae'a wéwiýana Maníkó tuwánéna aamoí uwátinkainiye. Minááígóní áwáuma é'a wéaraaiwaefo miyáumai arááiwa'mae'a koró. <sup>2</sup> Fasi'aénkó Ísu simásímakain-amaanta simátimewanda é'a isé'a wéaraaiwaewe. <sup>3</sup> Maníkó maarámó íyantafena aráái wétaiye. Kembiwí Maníkómpá'á té'a wendé-í'a taúráaro. Aare-úméné inaamaru-úméné aseráaro. <sup>4</sup> Waaimó é'a aaremó maíyamba arupise úmai máéro. Miyámó íyamba Maníkó miyámó íyantafena aráái wétaiye. <sup>5</sup> Maníkómpá'ó ímbo tiyáan-kwaasimo ontembá ímba miyán-oro. Póí-iyankomo waafán-ínímbó máentemba ímba miyán-oro. <sup>6</sup> Maníkóní ámáámá miyáumai wérintafe'a aaremó maíyamba kentí waási ímba sáwí'a uwátínkáaro. Ááéma óraaka'a simátimeta séta miyá-sáwí-ámpá'ó wíyanamo éna Maníkó umbai-méyámbá timíníye. <sup>7</sup> Maníkómó wení waási-i'o uwásínkáinta kawé'ó úmaimo

méraandasafenasa wéuwasinkaiye. Ímbo sáwí'o úmaimo méraan-ita wéuwasinkaiye. <sup>8</sup> Mindásafesa sún-da-ai isésa tínaaeni'o uwátimiyawima ímba waási aantemba tínaaeni'a uwátimenaafó Maníkó wení Ufaen-ámútámbó tímiwainkwará'a tínaaeni'a uwámenaawe.

<sup>9</sup> Kembiwí kenti waási Maníkón-aaisafe'a timankúnkúmbo on-kwáásí moórá-mora kentirumbó tímén-aii Maníkó aráátímakaimba pó'a é'a miyá wéfo moórá-mora kentirumbó tímén-aii maankwándááífímbá ímba agaénaumne. <sup>10</sup> Kembiwí Máséndóniyaa-aempaken-kwaasi Maníkóní waási é'a kentirumbá tímakaawe. Óraaka'a séta moórá-mora kentirumbá tíma'mae'a íyóro súmbo <sup>11</sup> fasi'ámai imáyáa wé'e'a faru úmai mé'a kentúra'a káráwiye'a tómbó maíyantafe'a kísau máéro. Minááímá éta simátímakaunda <sup>12</sup> miyá é'a kísau maíya'a Maníkómpá'ó ímbo tiyáan-kwaasi tuwánésa kembiwísáfésa kawé'-wáási owémá sénááwe.

Miyá é'a kísau maíyana ímba táái táíniye.

*Fasi'aénkómó kumínda-aii.*

<sup>13</sup> Kentáásí waásisono. Maníkón-aaisafesamo timankúnkúmbo un-kwáásímó púwówasamo utámakaan-kwaasisafe'a tirunkó sáwí'an-ifo séta

érai'-aaimo simátíménda ísáaro. Maníkómpá'ó ímbo kááísamaimo mésamo Ísu kumíndara'o pukáampinkembo íyáfasinaiyantafesamo ímbo amu'maráan-kwaasi tirunkó sáwí'a wéifo kembiwí miyán-ifo séta senda-ááísá ísáaro.

<sup>14</sup> Ísu pukáimpinkemba íyáfasinkaintafeta érai'esa súmbo Ísun-aaisafesamo timankúnkúmbo ésamo pukáan-kwaasi Maníkó miwíwará Ísunkwará'o tiyáinda-aaisafeta érai'esa sune. <sup>15</sup> Simátíménda-aaima Fasi'aénkómá siyáin-aain-iyé. Fasi'aénkómó kumíndara'a úwoimo túmó aráan-kwaasi pukéwi aifa'á ímba íyáákanaawe.

<sup>16</sup> Maníkóní kísau-waasigo wíyómpakewi aái sínana

Maníkóní uwíyenko óraaka'a aai sínana Fasi'aénkó óraaka'a wésindafinkemba wíyómpakembo kumínda Ísu Káráísitin-aaisafesamo timankúnkúmbo ésamo pukáan-kwaasi aifa'á iyáfasinaiyata <sup>17</sup> Ísu Káráísitin-aaisafeta simankúnkúmbo étaamo úwoimo súmó aráandawisa kufarámbainata ainámpímbá aifa'ó iyáawise'a itúwaandu éta Fasi'aénkómbá iawánéta miyáumai aasiyaasi Fasi'aénkóe'a maé'mae'a ónaumne. <sup>18</sup> Mindásafe'a simáti-simati wée'a fasi'átinke'a méraaro.

## 5

*Fasi'aénkó kumíndasafetaamo to'mayaa onda-áái.*

<sup>1</sup> Kentáásí waásisono. Fasi'aénkó Ísumo kumínda-kanaa ímba ísare'a maankwándááíffímbá ímba agaiyáumne. <sup>2</sup> Kemá ísaraawe. Nó'waamba umén-kwáásímó kafíffímbó tentenkáán-úmai Fasi'aénkó Ísumo éna miyáumai kumíniye. <sup>3</sup> Waásimo maarámó sentembá káfé'a kawe-kánaáfímbá aáno úmai méraumne siyambanifo minúwóiyáámbó éna sáwí-kanaago téna tasáwí'a uwátinkainiye. Aaregóní kanaamó tisanamó ímbá iyámpói wéma'ankaiye. Miyámó ontembá misáwí-kánaágómó éna ímbo asétinkainda seyaafá'nánká ta'ótorainiye. <sup>4</sup> Kentáásí waásisono. Umén-kwáásígómó kentí moparawímbó tamaimaiyáina'o awáné'o é'a táátafe'a iyambanifo ímba kumeupá'á méraamba póna Fasi'aénkó Ísumo kumínda ímba táátafe'a ónááwe. <sup>5</sup> Kembiwí sámó kaiwáín-aráátomba owatá kesááwará'á ímba kumeukóndésá úmpo sámó kaiwáíndésá úne. Ímba sáátafeta ónaumne. <sup>6</sup> Tuwímbaimo ombá Ísumo kumínda-imayaa ímbo ombá káátumo wáෙන්tenkaamba wéofó kesáá ínta miyásá éta káráwimaisa kawe'-ímáyáásá úmaisá ménaumne. <sup>7</sup> Waási nó'waamba tún-kwáéwasa uwóí'o on-dómbó naan-kwáásí nó'waamba nésa uwóí'a ónááfo <sup>8</sup> kesáá sámó

kaiwáín-aráátomba póta ímba miyaráántá ondasá kawel-ímáyáá úmaisa ménaumne. Miyáumai méta wenókáámbó faférimaisaamo méraundantemba Maníkómpá'á simankúnkúmba éta waásisomba siruntá wétimeta méraumne. Wenótámbó súsaamo fáítuwaundantemba Ísu Káráisiti kusiyáíndasafeta amu'maréta méranaumne. <sup>9</sup> Maníkó wení waási-ita uwásínkaraimba kentáásí sáwí-kisaurakemba Maníkó ímba áyánta uwásinkainifo Fasi'aénkó Ísu Káráisiti kentáásí

sáwí-kisau gomo ta'ótokaimpinkemba faúsinkenasa kawepátá mósinkaindasafena Maníkó wení waási-ita uwásínkaraiye. <sup>10</sup> Fasi'aénkó Ísu Káráisiti kentáásáfénawe séna pukáimba póta kumínataamo éta úwoisaamo méraunda-waasiwara pukáan-kwaasiwara'o éta weséta ménaumne. <sup>11</sup> Mindásafe'a moórá-mora túwa'nai e'a kawel-áái símasima'o íyamba pó'a fasi'ámai ménaawe. É'a wéomba pó'a miyá úmae iyónááwe.

<sup>12</sup> Kentáásí waásisono. Moórá-aaimo óraaka'o simátíménda ísáaro. Kempímbá kísau maésa kawel-áái simátimesa fasi'ámai arupíse uwátinkaiyantafena Fasi'aénkó miwí íyáfasintinkarain-kwaasi-taai taawiyáfóro. <sup>13</sup> Kembiwífímbá miwí kísau wémaentafe'a pó'a miwí táái mósá maré'a kentirumbá wétime'a méraaro. Kembiwísé'a faru úmai méraaro.

<sup>14</sup> Kentáásí waásisono. Óraaka'o súndasa kafóná-waasisafe'a óraaka sé'a arupíse uwátínkáaro. Táátafe-samo íyan-kwaasi tirumbá fasi'átínkáaro. Aamoisaén-kwáásíwará'á túwa'nai oro. Seyaafá'-wáásí wempa'á aáno úmai méraaro. <sup>15</sup> Kembó sáwí'o uwátínkéwa'a anondáá miwí sáwí'a uwátínkáafo sé'a aambá fáítinkaaro. Aasiyaasí miyáumai kembiwísé úmai ff'on-kwaasiwara'a kawel'á uwátínkáaro.

<sup>16</sup> Aasiyaasí tirunkó aamoí ína'a mé'a <sup>17</sup> Maníkémpá'á inái símae wéiye'a ímba saagaaró. <sup>18</sup> Kentópa'a fí'ofí'on-tantaa'a kawe-tántáá'é umbai-tántáá'wará'ó tinda Maníkémpá'á súwi seró. Miyámó íyamba Maníké miyámó íyantafena wéankaiye. Ísu Káráísitiye'a kááísamai mé'a Maníkémpá'á seyaafá-tántáátáfé'a súwimo wéseмба Maníké miyámó íyantafena wéankaiye.

<sup>19</sup> Maníkóní ámútankomba ímba aambá fáí'anke'a <sup>20</sup> Maníkóní ámútankomo simátímakain-ai wésimatimiya'a mináái ímba tínaaemba uwáméro. <sup>21</sup> Seyaafá-tántáá'á tuwíntuwe'a kawe-tántáák'á fási'ámai méta'otoraaro. <sup>22</sup> Seyaafá'á fí'ofí'o-sawi-tantaatafe'a aseráaro.

<sup>23</sup> Maníké faru wéuwatinkaiwaini áwáun-iyé. Wemá kembiwí wefári'o índasafeta inái súné. Maníké kentí imáyáara'e túwawaaka'e timanka'é káráwiyina'a kawe'úmai méraiyaamba Fasi'aénké Ísu Káráísiti kumíndara'a ímba sáwí-ai kempímbá wéraindasafeta inaisá súné. <sup>24</sup> Maníké éraikoni áwáuma póna wení waási-i'a uwátinkaindasafena táántaraiwai wemó siyáintemba miyá uwátinkainiye.

<sup>25</sup> Kentáásí waásisono. Maníkémpá'á kentáásáfé'a súwa'nai e'a inái seró. <sup>26</sup> Maníkóní akúmbá tiyáamba tíméro súné. <sup>27</sup> Fasi'aénké simásímakaintafe'a óraaka'a simátíme'a súné. Maankwándááífínkén-áái toráumai Maníkóní akúmbá seyaafá'nánká simátíméro.

<sup>28</sup> Fasi'aénké Ísu Káráísiti aasiyaasí úwoi wétuwa'nai-intafe'a inái súné.  
*Kemá Póro sún-da-ai taí'áiyé.*

Aú-aaí símai kááísamakain-aaí  
The New Testament in the Awiyaana language of Papua New Guinea  
Nupela Testamen long tokples Awiyaana  
copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

---

PDF generated using Haiola and XeLaTeX on 12 Mar 2019 from source files dated 5 Mar 2019

0dda5aa4-c019-59cf-b9ee-e1fd4762d49c